

林蕙堂集


文續編 五二六



漢書門	一	八	四	三	一
類	號	函	架	冊	

內閣文庫	漢	10808
冊數	14	(10)
函號	318	16

內閣文庫	漢	10808
冊數	14	(10)
函號	318	16





林蕙堂文集續刻卷之五

延陵吳

綺園次著

送李南枝遊宜春序

宗後學 琬繡永之重校

七載暮雲懷茲李白一江春水來共王猷方
為捫蝨之談忽並飛鳧而去黯然而况豈有
異於醴陵卓乎之情復何加于梁苑而李子
拂衣長嘯如登匡俗之峯擊楫高吟欲上子

林蕙堂文集 卷五

嬰之閣斯則寄懷山水良為結念雲霄者矣。夫李子以霞舉之才。值河清之代。使其成就。豈可涯量。爾乃屈首泥蟠。安身磐漸。超于磷淄之外。葆其貞素于中。聞達無求。歌不傳乎。哀鳳。是非靡及。影獨遠于冥鴻。斯蓋大過于人。非只不同于俗也。况乎柳間習鍛。陶徵君之清節。可師。花下懸床。徐孺子之高踪。足尚。康郎山下。還看江鏡吹風。興霸祠前。爭看神



鴉舞日布帆無恙。訪遺跡以何存。濁酒堪澆。呼古人而共語。凡其所過。未免有情。則廣武登高。歎英雄兮何處。沅湘望遠。思公子而不言。抽兔管以題碑。染糜丸而寫壁。因以江山之助。發其今古之懷。昌谷之錦囊。探來復滿。文通之彩筆。夢過還開。既聽雁以宵吟。復聞雞而夜舞。壯哉此去。且將虛往。實歸。渺矣難從。誰復倡予和汝。採芙蓉於水末。願寄我以

新詩折楊柳於堤邊聊贈君以短序爾

送陳子萬歸大梁序

疆圉御歷無射吹商方掩虎阜之關忽枉龍
邱之刺庭空擁篲既左迎于五柳門前溪未
迴船遂定交於百花洲上班荆締好兄弟爰
及於機雲藉卉言歡伯仲孔偕于袁灌乃陳
子悽々欲別爰有感於授衣而吾儕忽々將
離豈能忘于攬袂夫梁園勝地雪苑名都人
盡能文尚有鄒枚之習俗惟近古多存莊惠

林意堂文集
之遺陳子以隱豹之姿修雕龍之業得清言
於樂廣聲起平輿馳美譽於左思名高洛市
必能自樹以遇于時行且有為用繩其武但
余將老倦哉司馬之遊梁值世多艱渺矣伯
鸞之遠越尋權何地恨無斗酒以忘憂相見
無期空有長歌而送遠悵碧草於千里把黃
花兮一枝斯時之情黯然而已况昔先人弭
策曾結客于夷門迄今從弟移書尚留家于

宋土子之歸也指江水以寄愁我所思兮望
雲山而增歎矣

林意堂文集
卷五

送何脫園詩序

歲在壬戌。時值清和。遇何子脫園於隨堤之
 上。人如明月。似平叔之當年。賦是梅花。見仲
 言於此日。爰投佳句。載覽新篇。風度夷猶。神
 姿清徹。相其格律。則祖述乎少陵。老人玩厥
 情聲。已伯仲于隨州。刺史把之過日。遂以忘
 餐。何其詞之工歟。信其人足尚矣。夫何子少
 懷壯志。早負雋才。奕代蔚乎家聲。四方傳其

物望竟其所至。將何事以不成。揆厥所由。豈
夫人而易及。而時方北道。集號東籬。蓋其寄
託遙深。欲在羲皇之上。存心卓犖。非同頽謝
之間耳。行既屆期。言以贈別。一編白雪。子且
操伯玉之琴。九日黃花。予姑釀王宏之酒也。

送家伯成先生赴閩臬序

六鰲砥海。銀箭頻飛。九里騰波。金戈未偃。
聖天子臨軒鼓瑟。爰求忠義之臣。諸元老當
陛推輪。聿重文武之憲。我伯成公懋膺上簡。
特擢外臺。甫奉皇綸。聽歡雷之忽動。才登
祖棹。報瘴霧之漸寧。實用二泉之名。升聞五
位。乃以百里之命。超進八階。昔公琰廣都。遂
錄尚書之事。子康密縣。平登褒德之侯。今古

原無幾人。遐邇傳為異數矣。而公當仁不讓。受寵靡驚。雖截鏡道旁。去後思深於何武。而埋輪亭下行。來志壯于張綱。允為公輔之才。信有社稷之器也。然職司綱紀。道重激揚。方反側之時。脅從多有。迨兵燹之後。訟獄繁興。或禍起于同文。而張羅受慘。亦門開于告密。而投匭生冤。虫得酒以難消。鴉挽鈴而莫訴。自非敦頤澤物。誰從一路求安。元結綏民罕

為八州請命。况夫中和洒翰。寵被赤幢。平反篝燈。恩流丹筆。在古人之報國。無忘忠厚之心。乃才子之當官。必有文章之氣。公之往矣。活萬人者。必封我所思兮。潤千里而不遠。將見釣龍臺上。謳歌不異于龍山。佇看浴鳳池頭。簡拔還歸于鳳閣。綺誼叨昆弟。慶在國家。竊自附於贈言。聊共申其送遠。青箱命子。用歌楊柳三章。紫帽逢人。好寄荔枝一幅。

--	--	--

送盧菽浦之戍序

今皇上三十有三年仲春既望盧菽浦明
 府以無妄之災蒙明夷之難遣謫於晉之太
 原時有吳子聽翁送之于蜀岡之野飲之以
 邗江之濤而告之曰夫君子之處世也因乎
 其時故古人之當憂也貞之以道是以眉山
 患難作過海之雄文禹錫迪邇有作賓之特
 召龍蛇之伸屈既已無常虎鼠之行藏因之

麻定惟君子泰然於其際。以待天道之清寧。達者坦然於其中。以俟人心之轉易。故能仰回帝命。用承銀信之來。上鑒天心。特受玉環之賜。理應不爽。事有固然。今先生以楚澤之名流。宰廣陵之巖邑。神明重譽。冠于百城。慈惠循聲。傳于四野。徒以狂蜂之噬。偶爾經天。遂至征馬之行。飄然去國。廿五年之知遇。不能自保其身。三千里之流離。何處可為其室。

傷哉冤矣。誰與辨之。雖然。聖主之恩澤。甚寬。仕路之是非。有定。時事之往來。不一。人生之榮悴。有時。吾安見汾水之波。長流而不止。太行之霧。終昧而不開耶。請為歌屈子一章。聊以當枚生七發。

王北山都諫五十壽序
今天子崇文覃飛龍之治群公式叙修振
鷺之儀清問不輟於臨軒敷奏時勤夫佩筆
我北山王公以臺諫第一首簡宸衷唐識
李嶠稱為才子宋登蘇軾選在正人而公以
不世之才際有為之日方騎羊之歲李泌談
棋迨蔚豹之時張憑理楫金門射策入天祿
以吹藜玉署揮毫上瀛洲而視草自甲至乙

王北山都諫五十壽序

今天子崇文覃飛龍之治群公式叙修振
鷺之儀清問不輟於臨軒敷奏時勤夫佩筆
我北山王公以臺諫第一首簡宸衷唐識
李嶠稱為才子宋登蘇軾選在正人而公以
不世之才際有為之日方騎羊之歲李泌談
棋迨蔚豹之時張憑理楫金門射策入天祿
以吹藜玉署揮毫上瀛洲而視草自甲至乙

凡四庫。讀人間未見之書。襲六為七。作一經。是天下可行之語。時推陸贄。爰欲見之。施行。上識賈生。遂以觀其諷誡。烏鵲集。升平之第。乃應遷官。白馬乘光武之朝。還聞指佞魚頭。比勁不憚批鱗。虎領抒忠。無嫌履尾。趙忠獻三十六事。一一朱銷。韓魏公七十餘章。頻白副。然而存聖朝之寬厚。靡尚風聞。若乃陳民事之艱難。偏多露奏。松到天而不屈。葵向

日以恒傾。故事莫重於格君。請經筵以崇正學。惠無踰于愛物。論清大以豁浮逋。軫畿輔之灾而歡聲動地。諫頌歷之失而鉅力回天。膽落貔貅似温造之彈。李祐跡銷狐鼠如元禮之按張成。是以哲后改容。都人斂手。兩畀進賢之任。皆收得士之功。桃李悉入公門。楨梓盡登天府。門生脚跡。傳衣鉢以金蓮。公侯腹心。得翹關于玉筍。遂使獻聖主之頌。

賢臣允賴直臣歌王國之詩多士咸由一士。蓋其政事原乎經術。故朝野仰為真儒。風節澤以文章。故進退皆成學道。當其聞慈幃之變。廬處三年。迨乎忤貴室之心。岩居數載。淮南枕畔。但有鴻文。西蜀亭前。惟多竒字。雖天人之已對。尚下董帷。即日月之云除。仍親孫案。滋蘭樹蕙。時歌屈子一篇。蒔柳栽花。獨向元卿三徑。被服有同乎寒素。鄉關罕識為貴。

人斯其曠懷雅致。渺矣難幾。實則峻節清風。確乎不拔也。若夫天懷純孝。南陔常自耕田。至性友于。北阮曾聞讓宅。任彥升之祿米。半乞親知。徐孝穆之車裘。恒資族黨。都無介意。推童子以赤心。豈待論交。埋故人之碧血。微才可錄。項斯頓引以登龍。片語相知。朱季何辭於稼。驚此則挺峻望于一時。寧讓昔人於千古哉。憶余未申之間。遇公苔雪之上。瓊林

玉樹見太尉。迥出風塵。金馬碧雞。信使者能
操月旦。而公周談榮利。謬許清游。浮碧浪以
連朝。對愛山而終日。共平原之坐。十日壺觴。
泛清獻之舟。一囊圖籍。及乎分襟河上。歸袞
朝端。泰斗維隆。幸得分輝於威鳳。雲泥自遠。
猶蒙垂念于窮魚。茲者歲值彊圉。月居監德。
余友賀子千里致書。謂夫會啟龍華。香聞浴
佛。實當夢來麟紋。慶協生申。瞻紫氣于函關。

誕黃星于崧嶽。長羸屈節。應呂律以全昌。大
衍成著。得乾坤之正策。顧賤子奏南飛之曲。
俾同人獻西望之觴。爰考前人。辛謹懷康濟
之志。用稽此歲。翁子當富貴之時。而公姓名
早著於彤闈。勲德已傳于青簡。豈待熊經鳥
伸之說。驗其麟摩鳳集之祥。但當開櫻筍之
厨。酌鬱金之酒。為億萬人而請命。壽及蒼生。
用五千言而養生。道崇黃老爾。

臬憲金公壽序

西京七世。光祿特著其忠勤。南宋千言。太宰
允稱於博洽。累傳碩德。篤起偉人。我長真金
公。越水鍾靈。燕山毓秀。得冬成歲。當君子之
乘時。誕嶽維神。應正人之得位。二難競爽。羨
龍躍於平輿。百行咸脩。聽鳳鳴於岐嶺。彈琴
受訟。入縣皆花。製錦當官。隨車即雨。詔以豫
州為法。政莫善於賈逵。出守廣陵之區。眾悉

呼為名伯軍國資其飛輓金粟藉以流通名
 動宸扆威崇憲府赤幢曲蓋以寵向雄蒼
 佩彤璿而來郭賀胸中冰雪能平雀鼠之心
 手內雷霆欲破狐狸之膽矯長孺之節藜杖
 皆蘇大于公之門蒲鞭不試黑頭未老佇登
 公輔之階黃耆何難自是神仙之相蓋由少
 由壯而至于耆艾陰德有似乎耳鳴自令自
 守而迄于台槐盛業幾難于指屈史之言循

吏活萬人者封詩之頌大賢作三朋為壽勲
 績已詳之鏤鼎紀述豈待夫抽毫哉獨是公
 之為政斷于經術而加醇公之治人本于風
 雅而益厚澤加四海所至皆慈惠之師名重
 一朝共奉為文章之主梁園賓客時滿座中
 蜀郡絃歌常聞境內西園竹葉頻開文學之
 尊東閣梅花共索何郎之句如一麾于汝水
 重新大復篇章方再蒞于平山更大廬陵堂

杜蕙堂文集
構望仙樓上。六朝之山水全收。喜雨亭前。四野之禽魚欲舞。青箱萬卷。有才子以讀書。絳蠟三更。共夫人之捧筆。此皆近時之罕見。亦豈俗吏所能為也。夫人雖富貴。惟有德者必傳。道有盈虛。獨斯文而可久。豈待熊經鳥息。守黃老之庚申。二首。六身算絳人之甲子。耶。子偶來桃葉。適慶椿齡。敬捧兕觥。從父老之後。爰抽兔管。進元輔之前。

家中一七十壽序

余家自延陵以後。代有執珪。廣平以來。門多列禁。文稱三變。體首創于左臺。詞重一時。名更高于中舍。鳳皇村裡。碧沼浮香。鸚鵡筵前。采毫稱妙。大魁游登于昭代。名卿迭見于兩朝。良為蔚然。可云盛矣。然而虎頭未遇。猿臂難逢。疊竒字於一床。蠹魚空老。著雄文以千卷。繡虎徒傷。亦有其人。實傷其世也。子族侄

中一隱君生而穎敏，幼即權奇，白鳳集肩，應
懸鈴之夢，蒼麟奮趾，兆吐紱之祥，恢也相期。
吾家不乏季子，柔之見賞，君才可比楊雄，而
運值中衰，時方多難，嚴君已卒，烏鳥歎其難
存，豎子營錢，鼠雀為之自飽，青衿一領，徒嘆
歲之年，黃綃千箱，但笑期艾，見小試
則勇，何才之多乎？遇大敵而奔，非戰之罪也。
乘風宗慙，空思萬里之雄，失路劉蕡，頻為六

月之息，乃復怨尤不作，義命自安，忘得喪於
楚弓，任盈虛于魯席，趨庭有鯉，學禮而還，以
學詩射井，無禽讀史，而還為讀易，時而素蕘
淪雪，常含泉石之滋，時而紫棧浮烟，忽起樓
臺之氣，陶淵明之室內，惟有琴樽，許元度之
窗前，無非詩畫，蕭然自得，多忘螭螟之爭，淡
若無營，靜看鷄蟲之競，而情深賑患，恒裹飯
於雨中，且義篤論交，欲分金于臺上，焚券非

關于市義不待馮驩、纓冠常為夫解紛、偏多
袁陟是又勇於為德、厚於濟人者已、而世事
多澆、人情日薄、借耨鋤而見色、諛語時聞、破
斧甑而失聲、傷心不免、門前十丈、難消蠻觸
之塵、山下多岐、莫問羝羊之徑、故當年之榮
辱、不入于心、且此日之紛耘、不關其累、其於
黃老之旨、得之已深、何必絳人之言、算而始
識也哉、然而人多似馬、總是白眉子、盡如龍

咸同紫色、仲君某、名高石鼓之碑、季子某聲
振環橋之席、森々桂葉、看来絕勝燕山、奕々
蘭枝、種就都如李浦、將異日之繩、乃祖遠勝
于前、而皇天之報善人、必昌其後矣、茲值斗
杓之指亥、適逢崧岳之生申、入靈女之廟中、
歌傳赤鳳、見麻姑于海上、脯擘丹虬、余也忝
阮氏之步兵、竹林曾入、似王家之痴舛、椿榦
親瞻、實久羨于至人、遂榮觀乎勝事、君之醉

已且待蒲輪之徵。我所樂兮。更酌松醪以獻。

盛齋斯五十壽序

霽溪解組笠澤浮家看花鄧尉之山。藉卉吳王之苑。獲交高士。時有求羊。爰愛名賢。多如枚馬。常為置酒。論故事于青梅。每復和歌。記新聲以紅豆。尤與吳生交好者。則有盛君霽斯焉。君夙負雋才。少多至性。恥為章句。班仲升投筆以興嗟。小試經綸。費長房懸壺而樂道。洛陽市上。曾教女子知名。少室山中。徒說

至人無位。乃君冷然而善。具詩人之情。藹乎其温。有君子之德。何煩猛士。不教貢父。眉揚雅以雄文。可使曹公頭愈。况乎才精。碩曲學妙。審音白石。吹簫自譜。新詞一闋。青蓮吮筆。頻傳雅調。三章度雲母之屏。前冠新聲於法部。付雪兒于坐上。傳麗句於賓筵。斯則豔極芙蓉。良亦秀傳楊柳者矣。爾乃温恭御物。孝友承家。子騫曾無間言。太邱嘗多懿行。林中

覓筍。惟以供甘。陌上推梨。不渝其愛。銅盤餽食。撫育過於所生。玉粒調飢。施濟頗能無倦。是以管公鄰叟。嘗感分泉。朱氏鄉人。咸能讓畔。慕其行誼者。既比之以馬少游。見其詞章者。亦擬之為韓康伯可也。然君之品無忝如松。而君之年甫稱及艾。較高適學詩之歲。則已著才名。若翁子富貴之期。則方當榮顯。時維佳日。門鮮雜賓。庭桂初開。諸君皆舉觴而

泛月籬英將茂吾子其進爵以延年乎。

新安太守朱公壽序

予嘗讀書至元崇受代。荆人乃截鐙以遮留。侯霸名遷淮浦至攀轅而擁塞。或嚴裝待發。山鵲為之啣旌。或襜被將歸。櫪馬因而頓轡。竊以為史臣揚厲多過實之辭。文士鋪張盡浮夸之論。爾茲者重光御歲。橘且當辰。方載筆以歸鄉。乍回輪而入郡。時我朱公偶因夙累。忽至左遷。政拙催科。大臣雖循例以入告。

恩留汪濊。小民乃懷德以驚傳。於是士罷弦。
歌農拋耒耜。荐紳伏闕。車不待駕而遄行。童
叟途爭汗。未及揮而狂走于斯時也。不既岌
乎。乃三事大夫。盡聞聲而嘉歎。九重天子。
遂覽奏以咨嗟。謂有臣而若斯。萬物將為吐
氣。撫吾民而如此。四海可以無憂。爰沛德音。
用抒重望。破一時之格。行將破格以登庸。緣
萬姓之情。必且緣情而大用。詔傳之日。六邑

歌舞以騰歡。命至之時。億兆喧呼而拜德。且
節逢日至。運值陽舒。璧合珠聯。方慶大人之
占。黍葭吹灰。動盡知君子之道亨也。蓋世尚
矯枉之風。人懷束濕之慮。清或傷於過察。而
度鮮寬容。剛則嫌乎近苛。而道乖忠厚。乃公
也。胸包愛育。體備中和。二曜無私。趙之日惟
冬而靡夏。四時有序。程之風即肅而皆溫。是
以具直與方。而獨成其大。兼清與任。而悉出

于和竿牘難通而不作岩々之色。問遺不受。而匪沽。皦々之名。馭屬吏以深恩。而臂指遂能相應。協寅恭以厚禮。而手足乃以不殊。是以登元禮之門。同飲醇而俱感。入彥升之座。偕挾纊以忘寒。禁少長羈。茂樹生青于園戶。案無留牘。好山繞綠于訟庭。息積俗之囂。而牽牛之辭不聽。革里胥之擾。而冠虎之刺無聞。化類文翁。有造者人皆譙秀。政如言偃。能

來者客盡滹臺百廢俱興。數仞之宮。有臯門而俱整。萬家同載。千尋之堰。與洛渡而偕修。峯號蓮花。比其嵯峨。而莫及。灘流竹箭。較其灌注。而益深。則其德無窮。而其名益久。將與莊椿比算。漢柏齊年。豈若朝菌之華。榮爭旦暮。實已汗簡之錄。光賁古今矣。抑公之先。敬則以廬境之聲名。立登宰輔。仲卿以北海之治行。趨拜地。卿考前事。以非遙受。皇恩其

益重其親逢盛事近矣榮光始知當代所為
去古人而未遠乃知程史所載在前世而非
誣通閭宮之篇聊為生民而志喜獻春陵之
作更慶聖主之得賢爾

徐母碩太夫人六十壽序

歲屆旃蒙值天門之始旦月當畢相度星駕
而方旬驗瑞英於璇堦辰臨二九採靈桃於
瑤水算合三千我年伯母碩太夫人悅結五
花席加三豆婺華宵映雅協夢庚壽極秋懸
始稱週甲舞綵而人皆宮錦稱觴而客致上
尊乃果亭立齋兩先生珥筆西清徒切望雲
之想健庵年兄脂車北道彌深愛日之忱瞻

此春暉借經秋禊中和令節聊將檀尺添籌
聖善隆儀不待金錢合樂三宗奉筭咸歌頌
魯之詩列郡承筐并效祝華之冊謂太夫人
家承曳履室有賜書世本玉堂偏宜咏雪生
成金屋不憚履霜桃花爰賦於南州蘋藻聿
脩于東海擁牛衣而共語恒慰仲卿肅鴻案
而相莊無慚德曜晨昏黽勉當采莖以供炊
風雨漂搖每牽蘿而是補既曰女以代士亦

云母也兼師畫荻堂前并是人間金馬看花
江上摠為天上石麟雲在機先龍尾冠龍墀
之選錯隨鉉後雁行齊雁塢之名分燈而送
映金蓮草制而同依珠樹鸞迴紫誥寵極河
山燕喜朱擘榮深雨露而太夫人處之歆若
視以菘如顧明璫而不御猶訪蒿簪曳綺製
而彌歡長求弋綈蓮花有國心飯祗樹之篇
菰米成餐口給翳桑之飯老而益篤貴極靡

林憲堂文集
卷五
五
驕計其鍾祥。厥惟二善傳而長世。實有四奇。小子敢越席以抽毫。大夫其洗觴而待酌。蓋聞裴郎高第。僅羨一夔。孫氏聯魁。纔聞兩鶚。在紅菱實闕于國寵。豈青箱可任夫家傳。茲則數應台星。象成鼎足。叟咨咸遇。而堯佐亦對鑿坡。遵邁同遊。而洪适仍陪鳳閣。踐群材之上。并得連枝。處萬選之中。恒先衆寶。爾乃蜂腰起歎。品量懸殊。龍卧難侔。聲名或異。幾

見玉昆金友。誰言三筆六詩。茲則家可為言。人皆有集。讀眉山之製作。不數文定文忠。續中壘之篇章。皆是孝儀孝綽。文稱花萼。詞號聯珠。禁中傳才子之稱。海內有正人之目。至于八荀競爽。未必同胞。三薛爭蜚。寧無異產。苟稍分于荆樹。必致憾于棣華。茲則簾墳合為一音。酥酪原無兩味。震坎艮之列卦。總屬坤成。孟仲季之分時。爰資歲序。鷓誇五采。都

出丹山珠耀九光。俱生赤水。若夫鳴珂入院。僅在一宗。植戟當門。無關他族。甯氏徒聞於起宅。崔家但訝其盜書。茲則得玉署之名。元是金閨之快婿。苗夫人有兒宏靖。識韋令為貴人。李太君得子叔原。許富公以國士補科第之盛事。巧借義床。傳姻黨之佳談。獨高溫鏡。竒真未有美。亦難名。凡三君子揚名以顯其親。皆太夫人貽謀以裕諸後。始則典珥收

書。驚衣資學。不祈金玉。常燃臺上之香。欲具盤飧。每到床頭之薦。繼則遺書教義。封鮪明。庶讀大過之爻。戒鍾毓以無咎。覽黨人之傳。勉于瞻以效忠。是以金桃表瑞。玉笋成班。賓至如歸。才多不忝。無煩啜粥。人知魏勃之心。何假造門。客重范逵之口。迨乎上林。既遇閭苑。同升。韓忠獻不負於科名。王孝仙無求于溫飽。楷模一代。小侯欽鄭穆之儀。羅致四瀛。

寒士抱沈憊之感。咏龍頭鶴髮之句。豈用相
規。觀鸞翔豹變之文。仍多拔起。將見諸王之
後。更有諸王。應知五竇之餘。還生五竇。太夫
人含飴萱寢。植杖蘭階。為繡帔之侍中。作絳
紗之都講。大軒丹轂。受義成之封。綵綬金書。
拜建昌之爵。鄉名萬歲。樂極千春。其為榮也。
寧有艾乎。昔逸少之妻。至耄耄而神明特茂。
齊賢之母。以老福而寵禮有加。以古况今。於

斯為盛况。考玉京之勝日。實為金母之誕辰。
輪馭斑龍。降阿環之少女。窗窺朱鳥。呼曼倩
為小兒。笙響三山。仙應遙集。圖開五嶽。慶有
夙因。某以坐末之碧衣。望壇中之絳節。周瑜
堂下。聊陳織錦之詞。天姥筵前。用博投壺之
笑爾。

為東樞弟婦邱孺人五十壽序

歲逢單閏月，屆蕤賓。余以送客過淮，旅居蕭寺，訪枚臯之舊宅。幸諸賦之猶傳，問韓信之遺臺。懷千金而孰報，獨東樞家仲。洎星陳諸君相與講，速狩之歡。並為敦鳴鶴之好，則有東樞內子邱氏大家。念我兄公，肅酒漿而弗怠。懷茲旅客，感脯糗之頻遺。爰以問厥家聲，則我同年兩太史之女昆。且以詢其內政，則

我靜公諸猶子之慈母也。母以希範之華裔。早歸季重之名宗。適運值中哀。時當末造。鸞軒既叶。聲無異于初調。鹿轂同將。禮更闕於方駕。向堂前以操帚。羞為靚女之粧。入厨下以嘗羹。不待小姑之問。曾無叱狗。禮嚴於曹母。遺經頻有烹魚。孝篤于姜。妻列傳。惟時持竿高鳳。方漂麥而不知。牧豕孫宏。亦負薪而何有。乃中宵推枕。先伸紙以待吟。或寒夜篝

燈。獨鳴機而未寢。茂陵秋雨。同心翔司馬之凰。大澤青雲。攜手隱樂羊之豹。履常盈于戶外。座滿還留。塵屢積于釜中。翦空弗恥。謂夫子豈長貧賤。巨源應作三公。愛吾兒必以詩書。易簡恒先。諸幼既勤。劬以緝柳。復黽勉而丸參。卦讀鳴謙。恒咨嗟而授卷。語聞匪義。輒恚怒以忘餐。入柳氏之家。雖親屬罕知其異。然馮母之炷。迺神明果鑒其誠。寶桂奇芬。羨

一枝之早發。劉芝競秀。看七業以同興。遂使
壺中共號為女師。門內無慚于家督也。時方
九夏。旬有八朝。云當設悅之辰。是有稱觴之
慶。序當大衍。在河圖雅叶中宮。伏應三庚。占
歷候初過寧。既風吹麥信。適快披襟。雨潤桐
花。方宜洗箏。維宗人介眉。以請。願逋叟拜手
而言。爰述徽音。用膺純嘏。隔絳紗而講。聽宣
文者重見斯時。頒紫綬以封。號義成焉。行瞻

他日

胡母汪太君五十壽序

余以顧長康之女箴。人不概見。劉更生之列傳。世所習聞。爰集彤史一編。用以傳馨千古。于是溯徽音於往代。昭示來茲。闡懿德于遐。陬。宣傳中甸。然而幃帟之行。無取英奇。貞烈之操。多由患難。若乃顯微一致。作遐邇之女宗。終始偕康。及倫常之閨範。扇清風於林下。實所罕聞。應婺宿於人間。良非易邁。吾於胡

母汪太君見之矣。太君赤水鍾華，黃峯毓秀。簪纓承越國之裔，鈇券金書，綸綍衍晉江之支。黃麻紫誥，苔姿夙裕，無煩習禮東都。蕙性天成，不待聞詩南國。迨及桃天之候，獲事伯鸞。適當冰伴之期，爰賓司馬。其歸我胡先生也。能改粒以椎髻，甘操帚而偏勤。方洗手以嘗羹，即含辛而無倦。念代夫而為之子婦矣，而違問其新，乃剖股以忘其身。姑兮而遂能

以起信非常之純孝，乃有其實。並避其名，復罕及之。撝謙惟誠，乎心故格乎物。且以良人遠出，將求祿以養親。君子遐征，惟孤居以持戶。東西南北，蓬矢之志。四方酒醢，米鹽井臼之躬。百務而太君畫方圓，而不困。合上下以靡愆，是以內顧不歎于北門。盛譽乃聞於西省。陳當世之務，直上金鑿。抒夙昔所懷，爰登玉陛。遂與道南侍御兄龍弟虎棣萼蔚其相

輝左戚右干荆枝聯而競茂。乃置田以贍其族。崇祀以安其先。義氣布於三宗。更解囊以濟其貧。炊糜以振其餒。仁聲敷於四海。微君之故也。非母之功乎。方思效力於九重。或值弄兵于七國。李供奉不污偽命。預避江湖。劉越石每憤忘家。竟歸泉壤。焗天莫補。義日俄傾。悼廣柳之難歸。流離異國。望維桑而尚遠。予于中途。而太君決計還山。無辭辛苦。全宗

返里。屢被漂搖。堂構有未竟之猷。頻煩丹雘。宮牆有待成之緒。力振鼓鐘。為其易復。為其難。雖風波而不懼。見其大不見其小。歷霜雪而不渝。是以鐘斧無虞。閭幃益肅。兼鍾之禮。郝之法。林下之風。自清在後。以裕前。以光堂上之春。更永庭。迨一鯉。砌繞雙雛。文既備其九苞。名高虎觀。足自馳于千里。氣振龍衢。蘭茁其芽。香映鸞迴之紙。萱堪為樹。花分燕喜。

之塔固其宜哉亦足報矣茲者歲在敦牂月
逢泰臘太君應河圖之中宮疇全箕範具義
丈之大衍德佩坤含而嗣君既舞綵于蓮峯
歡承色笑復馳書於莫水乞為表揚予夙忝
懿親屬有葭莩之好遙聞泚德敢辭葑菲之
章謹拂魚箋特抽犀管表徽聲於一代是謂
女宗介遐祉於千秋良云壽母爾

林蕙堂文集續刻卷之六

延陵吳綺菡次著

宗後學琬繡永之重校

王蒼霞萬卷山房詩集題詞

世途險阻每易危身仕路浮沉惟應裏足只
有青氈一片可稱吏隱之資况夫錦字半囊
足快詩豪之用蓋脂膏不能相潤故貪黷息
其誅求文史足以自娛而神明全於澹泊也

蒼霞王先生少懷雅志。長負雋才。本貞白之鄉人。為安豐之令。子仕而未達。官已多閒。初彈茂苑之琴。行理昉溪之棹。乃篋無長物。惟存首箇高吟。袖有清風。不減葡萄麗字。好而示我。輒欲享以熏香。持以贈人。亦匪等於懷璧。始知文如韓愈。何須伏宰相之門。詩似鄭虔。真可入飲仙之座。况乎溪邊釣石。任彥昇之所曾遊。嶺上閒雲。李謫仙之所舊憇。由是

而寫之逸調。出以新聲。登伯起之堂。先生自此升矣。醉司業之酒。老人其願歸乎。

姜仲子宣窠脂粉箱題詞

萊陽姜仲子博學而好奇。多藏而服古。所寶
宣瓷一器。質素文青。體堅制妙。詢之宮監。知
為翡翠香奩。置以書牀。用等琉璃硯匣。姜子
既獨珍之。什襲三君。乃競美以篇章。物兼華
實。以咸工詞。備抑揚而盡變。嗟乎。燕來漢殿。
夜珠時照露華。獺補吳宮。春暈還添玉屑。仙
如秦女。方塗一轉之丹。寵似昇平。特賜兩輪。

之。磴。昔。之。口。脂。面。藥。不。知。何。處。恩。光。今。則。粉。白。縹。青。但。許。名。流。把。玩。其。為。物。也。君。子。傷。之。矣。而。况。昭。陵。玉。匣。已。出。人。間。漢。殿。金。盤。盡。歸。天。上。考。工。零。落。久。無。大。邑。之。供。大。雅。凋。殘。非。復。宣。和。之。舊。人。事。見。其。盛。衰。物。力。因。而。消。長。其。為。感。慨。可。勝。言。哉。仲。子。其。韞。積。以。藏。之。異。日。可。執。型。而。考。也。

家文仲唾餘草題詞

家。星。陳。仲。容。雅。量。慕。阮。籍。以。入。林。承。祜。清。才。傍。枚。皋。而。卜。宅。十。年。持。想。每。飲。香。名。千。里。聞。風。恒。傳。好。句。而。家。分。三。春。跡。散。四。方。難。聚。首。于。灤。西。徒。懷。思。于。渭。北。茲。因。訪。戴。乃。獲。識。韓。而。星。陳。誼。篤。停。雲。情。殷。聽。雨。頻。過。廬。阜。異。靖。節。之。聞。鐘。每。坐。蕭。齋。共。許。詢。而。揮。麈。既。留。連。而。對。酒。遂。慷。慨。以。論。詩。初。未。開。函。即。有。清。風。

而拂座。既而終卷。盡看朗月之入懷。若成連之鼓琴。絃一彈而即爽。如歐冶之鑄劍。鋒有試而不留。則曰異哉。此才乃復近生我族。若其加之以學。何難直到古人。夫詩以傳情。而情必生于厚。詩以言志。而志必取乎深。幽蘭之馨。要滋之于九畹。芳桂之烈。乃被之于一山。渤海男意在研精。而名齊于摩詰。玉溪生心求入格。而品貴于飛卿。豈有他異人哉。亦

在刻意耳。由此而抽毫廣座。建幟長城。取水雪而携直。云君當自愛。得江山之助。毋曰臣疥不痂。

宗子得竹秘閣一具。厥質既良。其工特妙。相其正直。不殊君子之居身。助彼英華。每伴詞人而運掌。華子比之陶瓦。言分銅雀之形。汪君謂為策書用。鏤赤龍之字。二者辭既工。而調美。兩君名雖異。而實同。從此品重裘鐘。辭高筆格。築書城之偃月。長從管子登臺。銘筆陣於沒雲。欲為班生剖券矣。

題宗鶴問竹秘閣後

宗子得竹秘閣一具。厥質既良。其工特妙。相其正直。不殊君子之居身。助彼英華。每伴詞人而運掌。華子比之陶瓦。言分銅雀之形。汪君謂為策書用。鏤赤龍之字。二者辭既工。而調美。兩君名雖異。而實同。從此品重裘鐘。辭高筆格。築書城之偃月。長從管子登臺。銘筆陣於沒雲。欲為班生剖券矣。

少陵之吟落月雅憶平生彭澤之賦停雲願
言疇昔古人崇乎氣誼出之性情交相重焉
良有以也止瀾射陵兩先生徵君種柳學士
班荆同為山澤之游共結雲雷之契固已清
風被服古道照人矣乃止瀾因游寓之時錄
贈遺之作俾宋子穉恭用為世守夫穉恭之
濟美誠王獻之繼王羲而止瀾之締交則陳

跋孫止瀾太史詩卷

少陵之吟落月雅憶平生彭澤之賦停雲願
言疇昔古人崇乎氣誼出之性情交相重焉
良有以也止瀾射陵兩先生徵君種柳學士
班荆同為山澤之游共結雲雷之契固已清
風被服古道照人矣乃止瀾因游寓之時錄
贈遺之作俾宋子穉恭用為世守夫穉恭之
濟美誠王獻之繼王羲而止瀾之締交則陳

群之有陳紀詩篇贈答情致綢繆不足以風
示來昆。追蹤往哲哉。爰題簡末。俾教荷葉而
藏。永作家珍。可比梅花之賦。

鄭若干詩箋跋

予于辛未上巳之辰。重舉春江花月之社。維
時庭前受簡。不乏群賢。花下論文。盡來多俊。
而鄭子若干。蘭夢一枝。草生雙帶。文章清麗。
獨操正始之音。吟咏高華。自得元和之體。歷
觀五作。足擅一場。自可與子美聯鑣。豈但令
君苗焚硯哉。因題蕪句。用授棗人。

跋陶奉長維揚竹枝詞後

春風城郭舊是銷魂。明月樓臺時為腸斷。而
香車寶絡。雖如昔日繁華。乃繡幕青絲。迥異
當年佳麗。寫柔情於紙上。不減名士風流。寓
勝賞於篇中。欲問美人消息。君請歌竹枝於
堤上。余將尋桃葉於江干矣。

紫金丹小引

杵分兔窟品重元霜。藥獻龜臺名珍絳雪。張
子本杏壇之佳士。選種杏林以芝嶺之高。人
自畊芝畝。傳家金鏡。早看藏發光明。濟世珠
奩。更見書分宛委。惟茲秘授。實具奇功。砂鍊
蓉林。頻經九轉。丹成桃液。獨妙三還。氣可除
疴。似啟龍膏之合。香能辟惡。不殊螢火之丸。
得自神人。癰何為而徒樹。佩之君子。體竟勝

于紉蘭。

為撲庵和尚募具足戒衣單引

嘯。鷲。人。後。司。馬。家。兒。忽。有。意。於。離。塵。遽。捨。身。
而。入。道。頭。皮。直。上。雖。云。煩。惱。能。除。脚。板。行。參。
尚。有。威。儀。未。具。在。嗔。痴。既。絕。要。本。無。貧。而。慧。
定。維。修。必。須。能。戒。是。菩。薩。不。名。菩。薩。究。竟。如。
何。做。閻。黎。像。个。閻。黎。規。模。不。免。是。用。豐。干。饒。
舌。徧。求。檀。越。發。心。念。珠。有。一。百。八。九。要。令。隨。
時。圓。滿。布。衫。重。四。斤。七。兩。須。教。當。下。現。成。看。

他禪和子作甚麼生。惟願大善人說如是法。

霞霧山北菴募緣疏

五丁開嶂。罕覩神工。三癸建亭。爰稱勝跡。惟此菴城之外。多古道場。憶彼雲水之傍。為舊遊地。嘗愛山名。霞霧。厥稱境足。雲烟。向逢石屋老人。久幸秋圍。白象。非遇燒庵。婆子。俄驚夜舞。紺龍。火種蓮花。信因緣之有在天。開祇樹。知事業之攸存。茲有隱愚上人者。座列三支。燈燃五葉。軒轅峰頂。曾提頑楫之真傳。妙

林意堂文集
喜巖前擬續皎然之故跡。但高坐不為漢語。而上行未易唐指。是以抽毫代豐干而饒舌。俾之托鉢。乞給孤以蓋頭。倘童子聚沙共種。梅檀之樹。則山神獻木。即成簷蔔之林。識嶺路之高位。不碍吟成瞌睡。儘人間之興廢。還聞福在檀波矣。

募建巽閣專祠繆李二先生疏

蓋聞忠義之挺生。良闕國運。文章之蔚發。猶藉地靈。故一水稱丁。用兆衣冠之讖。而二山名酉。聿開圖史之祥。維此延陵。適當斗野。境稱靈秀。舊為君子之風。俗尚清剛。素秉正人之氣。乃坤維實為盤固。而巽位尚未崇高。何以為向學之心。且難副右文之化。陰陽是卜。取堪輿家言。風木相資。補離震間事。上圖傑

林惠堂文集
閣奉開化翊運之神。下殿高堂。列文貞忠義
之主。蓋以首嬰黨禍。雖百折而不辭。并能力
挽王綱。致九死而靡悔。齒牙盡脫。猶聞攀檻
之聲。支體無存。但有漬衣之血。倘無顯祀。曷
以激勵乎忠貞。得此崇祠。始足用存乎模楷。
况郡大夫主持風教。已有意於崇賢。豈諸君
子表率鄉閭。乃忘情于助義。特為饒舌。徧懇
同心。共謀不日之功。長逐無疆之秀。將見嗟

我畫棟。摩日月而對雙峰。聳峙雕甍。挹雲霞
而凌萬井。英賢鵲起。寧殊獬豸之山。科第蟬
聯。即在鳳皇之嶺矣。

為藏山和尚募塔疏

藏山和尚。白足清姿。赤髯異品。十年面壁。曾
窺立雪之傳。五夜入門。得悟拈花之旨。偶然
着手。妙墨無讓於貫休。率爾搖頭。新篇竟同
于覺範。虎溪大笑。惟共三人。鷲嶺孤行。獨留
一指。膺才高於週甲。道忽阻於建寅。看九日
之黃花。猶存我相。傲三生之白石。欲待他年。
隻履空歸。去來無着。寸絲不挂。究竟如何。嗣

子。斃。之。盍。金。棺。而。何。有。僧。雛。子。之。問。鐵。鉢。以。無。存。匪。藉。大。檀。誰。封。廣。柳。于。是。不。辭。饒。舌。覓。一。袈。裟。但。得。共。為。發。心。藏。諸。舍。利。上。兜。率。界。信。高。人。畢。竟。升。天。歸。窣。堵。波。非。長。者。那。能。得。地。即。交。情。以。完。禪。智。用。厚。道。而。結。勝。因。行。將。雙。樹。參。差。長。聞。淨。域。且。見。千。花。環。繞。更。禮。寒。山。

慈渡庵募殿小疏

赤。岸。分。流。山。高。五。嶺。白。沙。湧。浪。渡。險。三。潭。鼓。莫。奏。於。回。飄。舟。易。同。於。覆。釜。迺。有。給。孤。善。士。義。拯。迷。津。幸。得。知。本。禪。師。身。登。道。岸。花。龕。夜。誦。空。驚。怒。浪。橫。飛。蓮。筏。朝。浮。不。畏。業。風。吹。墮。伍。胥。請。客。直。教。喚。醒。醉。人。河。伯。娶。妻。肯。令。沉。如。浣。女。多。生。援。手。已。註。籍。於。東。華。一。把。蓋。頭。尚。浮。杯。於。西。竺。林。中。風。雨。蜂。王。臺。何。處。傳。燈。

江上波濤。獅子座誰來問法。乃屬豐干而饒。舌用禪龐。蘊以發心。江類獼猴。宏啟赤華之社。人如龍象。還開紫栢之堂。將成塔必始乎聚沙。豈種禾乃幾于生豆。語應不妄。福有所歸。

募脩香界庵疏

錫山攬勝。古有草庵。金地從新。茲名香界。蓋清江刺史。親荷鋪以誅茅。而蒼雪大師。自浮杯而證果者也。街升秀嶂。久歷經行。塢出古雲。恒多栖息。冠九龍而直上。獨高龍樹之風。凌一鷲于孤騫。是為鷲峰之境。豈意纖埃之忽入。幾遭大劫之全灰。茲幸梁汾居士。偶返故山。念彼楞伽山人。實為好友。解驂贖客。脫

才子於流離置驛延賓以名流為性命負信
陵之意氣而自隱於醇酒美人有林原之詞
章而更妙於舞樓歌扇昔經斯地願把臂以
入林遙指茲峰可同心而藉卉何其半生遺
世曾不染于微塵遂爾一笑凌雲竟永辭于
幽壤偶因殘墨爰展遺型聽橫笛于斜陽心
傷向秀奏鳴絃于流水夢斷鍾期將留幻影
于空堂用表知音于來禊乃有晉陵之仙尹

見義勇為更得申浦之賢侯聞聲助善共捐
廉吏之俸用表親仁兼全良友之情尤堪化
俗但義舉何容獨任而勝事必賴衆擎用告
同心共為協力山神運木便成七寶之臺童
子聚沙即是千花之塔檀施勿恡茨福攸歸

[Faint bleed-through text from the reverse side of the page]

為熊邑侯建書院疏

廣陵實為重地。江邑更屬要區。當水陸之衝。輪蹄交錯。值疲弊之後。呼應艱難。况頗測之人情。陰陽莫辨。且吹求之吏。牘左右安支。是以一日難居。肩荷者視如傳舍。千夫莫措。銓主者指謂畏途。時則旄鉞重臣。皆裁棠之召伯。至于檐帷循吏。有拔薤之龐公。尤幸真儒。來為仙尹。如邑侯熊公。龍山碩望。鶴澤英流。

射策以揆日名。高蒞官而戴星績懋。獄不苟而市不擾。吏治咸澤以文章。子言孝而弟言恭。聽斷恒先之教化。清矣不為沽激。故其清常湛冰壺。明也不事矯虔。故其明有同水鏡。機務無嫌于傍午。剖決如流。簿書不混于刁丁。毫厘必察。革火耗之羨入。而潤不染于脂膏。罷差役之追呼。而怒不聞于需索。嚴莠民之罰。而白望潛踪。絕囂訟之風。而蒼生樂業。

脩義學于四境。化美文翁講。聖諭之六條。功同卓茂。是以徵催孔亟。問閭無困苦之嗟。車馬雖煩。井里有豫遊之慶。一錢不選。咸知暮夜難干。五袴長聞。返覺陽春不逮。人真如父。縱是怒而皆慈。姓可名兒。但有恩而無怨。德難縷悉。聊以元黃為公子之裘。功匪筆書。惟願清白。留後人之法。原因善政。而更懷善教之思。誠以仁聞。而更冀仁言之益。况乃堂

林蕙堂文集

卷六

九

依楊柳。歐陽之舊宅猶存。則有嶺號梅花。何遜之清風未遠。特為講院。共近文軒。俾月吉而常臨。時聞讀法。庶風規之長見。獲遂瞻依。但受澤多同。而庀材殊急。既衆擎之易舉。共效子來。將合力以圖成。而永敦民俗矣。

募建西來閣疏

蓋惟金山獨峙。砥萬頃之銀濤。寶塔雙懸。鎮千尋之貝闕。是以龍軒遙駐。宸章燦日月之輝。犀管親題。睿藻壯江山之氣。則蘇子瞻之留帶未足為奇。而張承吉之聞鐘無能稱善者矣。然在上方而眺北固。有傑閣以號西來。窓中列千嶺之柔嵐。檻外收一江之勝賞。昔年締構。曾因賜紫高僧。此日摧頽。無復留丹。

松蘿堂文集
佳境是以斌如開士。不憚饒舌而效豐干。而
我小阮庭生。亦欲發心而同允度。但慳囊未
啟。誰為助木之山神。而妙果將成。必賴聚沙
之童子。則丹梯百尺。即仰睇乎慈雲。而繡拱
三重。便遙觀于法海。將見施無不報。應知福
有所歸矣。

為天續上人募庵疏

跨鶴城中。何妨飛錫。渡牛河畔。雅足停車。則
有天續上人。半偈清修。三乘妙悟。傳五葉之
法。豎拂子而隨參。作一枝之栖。放蒲團而不
下。布獅子座。三千那得容身。立蜂王臺。些子
如何着手。雖道人之漢語。猶存不了之緣。非
長者之唐捐。難助無邊之果。用為饒舌。共懇
發心。似西域之賢妃。甘輸奈苑。若東方之童

林蕙堂文集
子更捨旃林。則一把茅得以蓋頭。而三更棗
可尋歇脚矣。

紅鷺生小傳

高士橋西。是孝尼之故第。讓王嗣側。為彥博
之名園。槐柳交陰。蟬聲一巷。松篁遮響。鳥語
四時。蓋其間有紅鷺生焉。生夙負英姿。早懷
壯略。緣奉鯉趨之訓。遂忘鯢化之圖。陶元亮
之家兒。罕求聞達。王孺仲之嗣子。不事聲華。
用孝全貞。固其所也。于是覃懷六籍。極力四
聲。得北苑之精傳。旋為閣筆。有西昆之麗句。

特○妙○題○籤○篋○古○錦○以○為○囊○篇○裁○芍○樂○鏤○青○瑤
而○作○管○手○浣○薔○薇○金○粟○重○來○蘇○舜○欽○之○遙○追
太○白○玉○簫○新○製○姜○堯○章○之○位○唱○小○紅○歡○既○以
古○而○深○賞○復○因○奇○而○富○罇○于○古○器○辨○乎○周○禮
之○文○威○斗○遺○模○証○以○漢○臺○之○記○王○將○軍○之○庫
內○若○具○五○材○李○公○子○之○筵○中○無○非○三○代○苟○其
堂○中○賭○茗○不○妨○貴○買○徐○熙○若○至○袖○裏○懷○珎○必
至○狂○呼○米○芾○矣○而○且○尊○同○北○海○惟○醉○詞○人○坐

擬○西○園○偏○辭○熱○客○杜○司○勳○解○官○之○後○始○訂○忘
形○嵇○中○散○僵○卧○之○餘○還○為○納○契○雖○牡○丹○香○發
長○思○功○父○之○家○而○修○竹○清○風○不○減○元○卿○之○徑
至○若○酒○旗○歌○扇○時○迎○桃○葉○船○頭○側○帽○輕○衫○獨
往○梅○花○閣○上○遇○方○山○者○謂○為○豪○士○望○陶○峴○者
有○若○神○仙○而○弔○古○殊○多○問○天○還○切○過○埋○劍○之
地○悵○君○子○之○不○存○遊○響○歷○之○廊○歎○美○人○而○安
在○杜○鵲○月○冷○歡○少○于○悲○麋○鹿○春○深○今○猶○是○昔

林蕙堂文集

地經遊于蠟履。悉寄託乎彩毫。文為生馬。情
使然也。又或玉勾斜畔。惆悵飛螢。鈇甕江邊。
荒涼戰馬。尋西陵之舊事。兩峯未改。烟雲訪
南國之遺踪。六代徒存。花草莫不臨風。醜酒
對月興歌。撫長劍以款。歔。鼓哀箏而慷慨。昔
阮籍之登廣武。時少英雄。孔明之卧南陽。人
思管樂。含悲吐曲。觸緒言愁。見之或訝為狂。
識者獨傷其志矣。予與生遊同山澤。好締林

泉爰以闡其幽懷。用待傳諸好事也。而生架
蓄瑤蟬。恒多問字。屢隨銀鹿。頗解揮毫。墨沼
流成。獨得瑯琊之秘。黃庭換得。長懷曇瓌之
高。故自號紅鷺生云。

林蕙堂文集

卷六

話

馬伯元先生暨元配周太夫人忠節合傳

蓋聞烈士效忠。秉丹忱以弗二。貞姬守義。矢白首以靡他。是以運值昇平。勒景鐘以著績。時當豐豫。安幃幕以成家。若乃勁草之遇驚飈。人嗟板蕩。抑或長松之逢寒雪。衆歎風靡。則國爾忘身。獨甘勞瘁。心堅勵節。不慮漂搖。乾健坤柔。實相成以不朽。臣忠婦順。乃各致

林蕙堂文集
以長存。心有異乎。道惟一矣。若伯元馬先生。及周太夫人者。則見之矣。太夫人寶林世胄。鏡水名宗。裔出絳侯。世有弓裘之望。家原公瑾。人傳圭組之華。生有蘭標。早奉班姑雅訓。長多蕙性。無慚鍾氏方規。奠雁而配參軍。莊而有禮。挽鹿而歸司隸。孝本于誠。滿座賓朋。酒漿不匱。終年慰問。筐筥無慙。乃先生投筆從戎。慷慨濟時之志。彎弓破敵。雅多靖亂之

才一出而圖吾軍。三遷而帥其衆。璇樞拊髀。遙聞貔虎之威。瓊島銷魂。盡懾鯨鯢之氣。真將軍從天而下。醜類豈有遺乎。諸反側望風而歸。南人不復叛矣。鞠躬盡瘁。食少有似乎武侯。効力忘疲。星隕遂同于宗澤。維時天傾莫補。日出當心。未亡人欲相從于九京。藐諸孤尚伶仃于萬里。干戈阻絕。難歸廣柳之魂。山水崎嶇。莫返維桑之酪。而太夫人手瘡心

林蕙堂文集
碎淚以盡而血流。晝晝夜思。人屢危而天相。
身經九死。竟完穀于覆巢。體備千辛。乃歸魂。
于故壠。况時當改玉。既伏莽之未除。而家且。
賣珠復牽蘿。而無策。凋零井邑。每常歎于呼。
庚勞攘舟車。更多虞之傍午。白頭二老。將不。
免於飢寒。黃口多兒。正有需於教誨。仰事之。
于俯育。所賴伊誰。外護之于內調。其艱實甚。
太夫人手封馬鬣。十指幾至不完。力護鳳毛。

三餐亦為少進。堦前畫荻。總是淚痕。燈下丸。
參。無非苦味。含冰茹藥。凡四十三年。補漏醫。
瘡。有百千萬狀。既老而不懈。雖病亦不言。是。
謂竭婦之功。而復代夫以為子。遂能備母之。
教。抑且兼父以為師。所以懿訓維章。六龍爭。
為奮甲。徽音靡著。一鷄于以騰霄。澤及兩邦。
并有神明之譽。恩覃萬姓。益宏清白之儀。以。
致天賜。驚書人欽。鶴算堂中紫綬。拜義成之。

封塔下文軒賜建昌之號。世之寵禮行及無窮。天之報施。寧復有艾。夫婦以德勝。而持戶更復多才女。以貞名而立身。實多苦節。吾無間矣。復何加哉。迨及屬纊之時。猶然伏枕而泣。出篋金而修先墓。傳遺令而置祀田。斯豈庸輩所能實為。丈夫不及耳。爰紀其事。以告諸來。

羅母葉孺人壽頌

吾鄉之有羅氏三君子也。才堪鼎峙。如瞻韋室之星品。合珠聯並列。王庭之樹。而季子臨思。尤與予常敦文酒之好。數為山澤之遊。每嘆何物寧馨。得斯異質。遂至今時。淮海乃有俊人。而前此十年。獲為呂庭之姝。夜曾為數語。忝作魯國之俟。斯始知泰岳出雲。爰能致雨。醴泉沛澤。必有其源。則壽母葉孺人者是。

矣太孺人懿德天成徽音日懋蘭常在谷以
不植而偏芳李欲成蹊乃無言而更蔚雖顧
愷之史未能紀其二三即劉向之篇何足言
其萬一其為女也聞絃輒辨慧每歎于中郎
借硯能修文可續于班令而姊姊推為婉孌
保傅服其溫恭則孝著于家此其始矣其為
婦也挽鹿而歸提甕不辭其悴烹魚以進饋
食靡懈其誠琴瑟無焦殺之音機軸有箴規

之益則敬存於室又其大矣至其與人也
禮有法佩璲時解於延賓何有無方舟弗
忘于恤患三黨無憂舉火百口乃可名橋以
此為和可知矣若其守已也既明且哲保
家於數載之前亦泚而貞持身有百年之恨
將荼而若忘其苦畫荻而彌盡其心以此為
節靡加矣是以教成而業廣道在而名彰
耳目固以神明福祿深于日月今之矩昔又

十載焉太孺人之齡愈高三君子之名愈起而豐溪逸老愈見其昌者東閣之梅花猶存香雪挹北堂之萱草更見清風伏朱鳥之窓中聊窺阿母望丹虬于筵上復覩麻姑敢辭擘菡萏之箋用以獻葡萄之醞駐顏有術寧須問三祝之舊文註錄堪期願且更九如之新製乃為之頌其辭曰
坤輿毓秀離曜垂芒月為陰德宿有婺光爰

當北陸載降南陽諸梁衍派越國流芳惟茲淑媛用產瑤房玉侔結粹珠比温良聞詩漢殿習禮齋宮裳衣窈窕行珮從容在水上語有林下風言歸君子作配名宗裔華夢鳥譽炳乘龍琴調司馬案舉梁鴻鳴機助讀劉薦留賓翁媪相賀娣如維均乾餼罕怨鐘釜多恩薛家有鳳王氏咸珍訓惟以義教每由身養人以愛持節為貞辭多取寡戒逸甘勞恪

安義命理謝紛曉能書百忍獨化羣鷺禍因
 智免量以榮高行遵恕字吉取謙艾百年無
 與介祉是徽鮑背矍鑠鶴髮婆娑含飴自樂
 強飯益多長膺家慶永保天和孫枝蕃茂子
 姓駢羅蘭馨厥穎桂挺其柯百齡未艾千載
 奈何屠維屆歲應鐘發聲啟青紗帳駕丹轂
 軒宮開駐景臺築懷清赤霜繡帔紫電晨纓
 桑田笑指桃實歡呈永須介福長享遐齡

曲阜顏氏家廟忠孝碑

蓋惟運由五德以相壇不替聖賢之裔位以
 千年而得正聿昌忠孝之宗然日照月臨正
 氣咸資于神誕而山輝澤媚清風罕見於家
 傳緬想斯人盱衡當代則河間太守顏公父
 子其人也公家原復聖胄雖古而愈華代有
 名流文在茲而未絕與聞正學居七十二子
 之先獨受遺經在六十五傳之後拳如魯國

方總角而偏奇。舌似常山。每讀書而知慕。金門射策。廣川具繁露之才。玉殿揮毫。曲水羨凌雲之氣。初膺大邑。隨車即種甘棠。屢典名封。迎刃俱成。偃草雷霆在手。歷盤錯而無傷。冰雪為心。處膏脂而不潤。路留遺錦。民當綿竹。以無欺道。見縫裳。賊過朝歌。而必獲。而薛宣強項。不拜督郵。賈誼拊膺。恥同絳灌。是以舉旂關下。曾明大令之寃。題字屏中。獨重神

君之績。非長孺而不可。俾治股肱。使希烈而何辭。寧塗肝膽。茲則星精欲殞。天步將移。甲仗連營。中山無可完之壘。鼓聲動地。瀛海鮮不沸之波。鼠盡空城。尚扶病而煮鎧。雉傾殘堞。猶賈勇以登陴。國事將危。遂置身謀于不問。人倫自識。豈云天道之無知。毒甚燎原。總是丹心自熱。慘聞闔室。惟餘碧血難灰。而長君孝靖先生。清宵妖夢。早徵易簣之不祥。遠

林意堂文集
道飛書空嘆單車之莫挽。望雲已隔心驚。兩地傳烽乘霧維。遙益痛孤城受矢。粉身靡惜。揮愛弟於壕邊。折足成傷。遇遊兵于道上。如林戈戟。書生慷慨而直前。若畫鬚眉。戎帥仰瞻而加敬。似秦庭之痛哭。血是淚痕。若荀氏之長號。喉應氣哽。婦被割而罔恤。徒感心香。兒既病而難支。誰憐弱骨。叢披荆棘。窮晝夜以洗行路。塞豺狼望山川而袒泣。躡天湧地。


得殘骸於焦土之餘。斂死全生。拾完卵於破巢之內。遂使持名元老。嘉歎以為罕能。雪涕旅人。傳聞謂之奇事。乃先生力窮匍匐。負廣柳以歸田。意絕揣摩。守寒蓬而閉戶。傷哉仲也。痛天序之中零。念此季兮。勉月征而益篤。哀銜朱雀。類劉俊不過南航。誠感白鳥似王。哀曾無北坐。停雲朗詠。彈宗子之一琴。過日清吟。擁藪侯之千卷。帶經隴上。將猷畝以終。

馬。拄笏山前。謝功名而已矣。道旁守劍。鄉里
傳。王烈之風。井畔分泉。父老感管寧之化。齡
逾周甲。慨猿鶴之空存。歲值逢辰。嘆龍蛇之
遇厄。闡幽光于聖代。雖傳褒德之封。振清議
于禮官。尚乏易名之典。河汾澄學。門人竊號
為文中。彭澤高風。國史允傳乎靖節。謚曰孝
靖。禮不然歟。嗟乎。柴市歸魂。非有勸忠之子。
睢陽嚼齒。曾無併命之兒。茲則墓號忠貞。可

一門而含笑。澤流文史。比萬石而何慚。賢者
能世其家。君子克昌厥後。六龍夾日。李供奉
或是謫仙。雙鵲摩雲。杜司勳豈非才子。其論
交有素。景行無私。題郭泰之碑。斯為不愧。作
秀實之傳。此必可傳。爰刻貞珉。用書前烈。永
存家廟。以告後人。

鴛鴦墓碑

乙未秋仲言游雲溪有以野禽見餉者中得鴛鴦二隻義不忍食乃命童子瘞于峴山之陰明霞墓側享以並蒂之花薦以連枝之果酌雙溪之水以酌之而為之碑曰維此匹鳥字曰文禽綠首紅衿紋翎繡臆朝宛頭生來未識相思處俱飛夜何嘗獨宿暫分夢與不堪回顧頻才隔菱塘已聽相呼啞



林葉堂文集
三
唼。霍家池內。睡酣舒夜之蓮。韓氏墳前。戲上
合歡之樹。遂使幽姬意動。蕩子心回。效比翼
以恒。雙願同心。而勿替。豈身膏於鳴鏑。遂命
盡於驚弦。錦羽橫披。尚帶情人之血。朱絲斜
縮。難聯倩子之魂。何可供我盤觴。乃令試之
刀俎。于是瘞之重坎。刻以貞珉。無復濡于在
梁。聊以完其同穴。若令寫之圖繪。須登蘇蕙
之機。化作澄泥。亦是秦皇之瓦。

